

光緒朝東華錄

光緒十八年壬辰

光緒十八年元月

春正月

1 辛酉朔。丑刻。上詣奉先殿行禮。寅刻。詣堂子行禮。辰刻。詣慈甯宮行禮。御中和殿受禮。太和殿受賀。巳刻。詣大高殿、壽皇殿行禮。

2 宴近支王公於乾清宮。

3 壬戌。上御坤甯宮。賞御前行走近支軍機大臣等侍餞。

4 上幸南海。詣慈禧禮端佑康頤昭豫莊誠壽恭欽獻皇太后前請安。

5 還宮。

6 癸亥。上詣壽皇殿行禮。

7 遣麟嘉恭詣裕陵致祭。

8 雪。

9 諭。上年順天、直隸各屬秋禾被災。業經分別蠲緩糧租。小民諒可不至失所。惟念今春青黃不接之時。民力未免拮据。加恩著將文安、大城、涿州、開州、長垣等五州縣成災五、六、七、八、九分村莊應納本年春賦地丁錢糧各項旗租。著緩至本年秋後啓徵。其歉收三四分村莊並獻縣連年被災之張枝根等二十五村應納本年春賦地丁錢糧各項旗租。著緩至本年麥後啓徵。又勘不成災之武清、寶坻、甯河、樂亭、青縣、靜海、滄州、南皮、鹽山、慶雲、永

光緒朝東華錄 光緒十八年正月

卷三〇六七

平、東明、定州、曲陽十四州縣歛收三四分村莊應納本年春賦。照常徵收。其原緩至本年麥後啓徵之歛收四分村莊應納光緒十七年並節年地丁錢糧各項旗租。同歛收三分村莊應納節年地丁錢糧各項旗租。均著緩至本年秋後啓徵。凡有應徵屯米穀豆草束竈課學租。通津二幫屯租旗產錢糧。海防經費。河道錢糧。儲備軍餉。廣恩庫租。永濟庫租。兵部馬館租。鑾儀衛租。代徵租。暨出借倉穀籽種口糧。牛具等項。隨同正項糧租分別緩徵。津防廳葦魚課應納地租內有坐落武清縣者。歸入該縣災歛村莊辦理。以恤民艱。

10 甲子。宴蒙古王貝勒等於紫光閣。

11 乙丑。予故懋功協副將倪天元。照軍營立功後積勞病故。例議卹。

12 丙寅。上幸南海。詣慈禧瑞佑康頤昭豫莊。誠壽恭欽獻皇太后前請安。

13 還宮。

14 鹿傳霖奏。陝西大荔縣捐職郎中李安吉。家素殷實。安吉故後。其妾李劉氏之兄江蘇監生劉開泰。託名照料。潛肆侵漁。前後十年。訛去李氏銀錢爲數甚鉅。屢與李氏族人構訟。經前同州府知府文啓斷令驅逐回籍。不准往來。劉開泰復迭次砌詞牽控。經臣批由大荔縣訊明。斥革衣頂遞籍管束在案。詎劉開泰潛至省城。勾串臣衙門收發文件之堂房散書趙秉乾。捏造稟批。割取遠年騎封印牘黏貼於後。徑發潼商道飭提覆審。旋由劉開泰赴道投遞悔呈。情願自行回籍懇免革遞等情。本年五月二十日。由道詳覆前來。適臣甫由商州閱伍回署。案牘山積。該散書乘機將該道繳回偽批雜置其中。臣一時疏忽。未能看出。劉開泰遂得免究。先後付給該散書銀三百兩。九月初六日。劉開泰因病身死。趙秉乾猶時往其家。致與劉開泰之妻劉吳氏口角爭鬧。臣風聞其事。立提趙秉乾發交長安縣嚴審。供認捏批割印不諱。惟詞連署中幕友張樹炎。查張樹炎身居撫幕。文件皆經其手。趙秉乾不供他人而獨指樹炎。事有可疑。虛實亟應澈究。隨令出署候質。此案雖僅錢債細故。而以在官之人婪贓執法。實屬貪奸膽妄。已將趙秉乾發交兩司會鞠。務期水落石出。以懲衙蠹。臣未能先事覺察。理合自行檢舉。

請旨交部議處。潼商道文光。接到黏印偽批。亦失於覺察。應請一併交部察議。得旨。如所請行。

15 丁卯。遣光裕恭詣孝陵致祭。

16 予故兵部尚書彭玉麟於衡州。長沙府建祠。列入祀典。

17 戊辰。命巴克坦布爲左翼監督。立山爲右翼監督。

18 許振禱奏。黃河歲修之費。本國家一大漏卮。從來有日增。無日減。既今歲稍減。來歲必復加增。以爲險工無定。朝廷以其關係民生而不惜帑項。部臣以其尙合例案而不事苛求。故積弊日深。馴至耗費益繁。辦工日絀。此臣所以亟議改革也。原散於道廳營汛者。今則臣獨任之。若有疏虞。臣無所逃罪。然而不敢避也。臣不甚知治體。請以家事例之。如人家有大興作。主計畫者自必以省費爲先。以圖成爲要。又凡能省費者必易圖成。何也。將爲一定之工。必籌一定之費。先事詳思。臨事竭力。其所省者耗費。非正費也。耗費一省。工用歸實。故易圖成。夫黃河天險。臣豈不知。責備至重。臣豈不畏。而必限定額款。力求保固者。誠亦審度河勢。稽核工程。以爲如此則辦工不至竭蹶。可以從先事而爲補苴。遇險有所取資。不敢作危詞以瀆聖聽。以臣默計。所定六十萬之款。其實每歲所必不可省者四十八萬耳。至提歸河防局之十二萬。今年霜清時實餘出六萬兩。臣盡以買石加拋。至於來年必更得力。十二萬兩涓滴到工。即臣前奏所謂新增之補益也。向年用款亦有此數。未聞於歲修之外復有片石寸土到工。則今此十二萬兩堆積料石。衆目共睹。遇險不至張皇。辦公有所取給。名非節省而實則由節省而出也。大約如此補益。五六年後每年復可節省五六萬兩不等。但須悉如今者辦事。積久自可自餘。又河工每當大汛。不能無險。險亦不定生於何處。然未有先事而不見萌者。臣既以核實工作責之廳員營汛。復於河干另設一監工局。終年駐得力委員於其中。巡視兩岸。逐處勘估。以數萬金爲先時之籌備。復留數萬金爲臨險之搶救。似乎有險亦無他虞。然實仰恃聖主洪福。百靈効順。臣除殫竭庸愚。亦別無良策矣。又河工往年報銷。院道庫儲任之。凡冊籍由廳呈道。由道呈院。由院奏咨。部臣不甚議駁。以其悉合則例。庫儲之所以挾制上官者在此。其所以作

弊取利者亦在此。究竟所報悉是虛假。但求合例。不計核實。每年報銷開支用款二萬數千兩。臣去歲改章。亦經官吏力以公用爲言。提存二萬兩。所以暫爲提存者。實欲省出此二萬兩再歸入防河工用耳。夫臣既不用庫儲。一切改易舊轍。事事核實。則與往年大不相侔。即按之工部舊例。誠恐亦稍不合。仰蒙皇上天恩。憐臣之拙。憐臣之愚。臣敢據實報銷。不爲劣員劣幕挾制。而於公家用款實多盈出二萬兩。是河防局明定十二萬兩。今則添爲十四萬兩。以之搶補險工。豈非大益。此等有裨實用。想部臣素識大體。維持國計。亦必不以臣言爲謬。抑臣更有請者。向來河督不任修防瑣務。故報銷由廳詳道。由道加印。今則各處工作皆由臣主持。緣是遇險先搶。往往先辦工而後行文。此後報銷擬請專歸臣衙門用印辦理。不由道廳轉折。既可省費。亦易核實。惟向例霜清以後全工就閒。今則河防局正在委員四出購石買土。監工局正在監理各廳鑲埽添壩。工作正忙。用款未定。若如往年循例報銷。反蹈懸空欺飾之咎。必俟年終工役完固。石料用定。先查細賬。次驗工程。再爲核實報銷。年內時日無幾。萬趕不及。歷經奏展有案。合無仰懇天恩。俯如所請。展限至來年四月間再爲辦理。以臻周妥。並請此後無論何項送部冊結圖幅。就用臣關防印信。以省糾纏。而歸核實。允之。

¹⁹ 己巳。以湯彥和爲陝西河州鎮總兵。

²⁰ 庚午。時享太廟。上親詣行禮。

²¹ 皇后千秋節。停止筵宴。

²² 邵友濂奏。查臺北大料坎、三角湧、雙溪口一帶地方。逼近番社。光緒十七年三四月以來。屢有兇番殺害民人。自一二命至十餘命不等。疊據各撫懇委員稟經前護撫臣沈應奎。嚴飭統帶隘勇各營總兵陳羅督飭駐防弁勇拿獲番犯邁灰西學、帶木烏芸、哇素老涯、野微礮隆等四名。訊明分別懲辦。馬速社番拒捕。傷斃勇丁八名。將該社立時焚燬。嗣因查辦番案日久無功。當由沈應奎將陳羅及隘勇前左兩營管帶各員先後撤換。九月間三角湧等處殺人之案愈出愈多。兇番嘯聚成羣。膽敢於吶哮及古擺鶴等處地方圍攻碉堡。肆行焚殺。分防隘

勇。地廣兵單。迭有傷亡。不敷堵禦。沈應奎飭調定海正副二營六成勇丁暨就地陸續添募土勇千餘名。並經商准臣林維源親赴大斜坎飭督勦辦。當於竹頭角、吶哮等處。化番前來歸命。梗化之社查看無幾。議即會軍兜勦。詎兇番糾結後山內加輝各社圍撲隘勇。前營隔絕。所紮礮堡糧運水道。一息不通。軍火施放殆盡。該營管帶游擊林福喜間道馳書告急。接統隘勇各營已革游擊鄭榮。督帶土勇冒險馳救。伏番偏地。動輒傷亡。僱募化番前驅。自十月二十四十一月初六日將該處九礮次第援應。一面飭派通事諭散句結。各軍甫遵前議會擒。合昭坪兇番節節抗拒。勇丁奮擊。互有死傷。鄭榮由竹頭角進業吶哮。土勇隊長六品軍功林李川於夾板山接仗陣亡。撫墾委員直隸州知州陳長慶會同定海正副營由後策應。鎗傷腰脇。仍復揮軍進擊。番衆潰散。土勇管帶軍功陳福勝、守備林建庸等。分由大霸、大窩前進。各燬兇番之社。已據墜眼等社哀求歸撫。但未一律救平。臣自到任後。屢次會晤臣林維源詳加查度。內山、咸菜甕、五指山一帶社番。均甚平靖。其加輝各社。並已悔罪乞降。惟淺山水流東各社橫梗於中。若非亟予懲勦。難保不煽惑化番。滋蔓難圖。隘勇各營分界防守。值此兇番猖獗。正需彈壓。所藉勦番之勇。僅止定海正副營六哨及新募土勇。兵力尙嫌單薄。現經臣飭調道員林朝棟督率所部棟字各營。尅日馳赴會勦。以期及早安定。不至有礙撫務。報聞。

23 辛未。祈穀於上帝。

24 上幸南海。詣慈禧端佑康頤昭豫莊誠壽恭欽獻皇太后前請安。

25 還宮。

26 遣奎瑛恭詣嘉陵致祭。

27 予故海防水路記名提督宋先聘等二十九員故北海軍守備陳兆藝等三員優卹。

28 癸酉。上幸南海。詣慈禧端佑康頤昭豫莊誠壽恭欽獻皇太后前請安。

29 還宮。

30 甲戌。上詣奉先殿、壽皇殿行禮。

31 遣奕謨恭詣慕陵致祭。

32 予杭州乍浦滿營前陣亡殉難官兵婦孺建祠。列入祀典。

33 松樺奏。裏河廳屬順水壩。從前常年啓放。漕鹽及各商船行駛甚便。光緒十三年鄭工失事。議開新河。禦湖水闌入運口。遂將該壩堵閉。專爲一時防黃之計。茲幸黃水並未趨下。而往來舟楫繞道新河行走。以致清和縣馬頭鎮一帶。商民生計爲之頓蹙。近年重漕鹽運及各商繞道新河。每以行徐曲折。久延時日。疊據地方士民商賈及押運委員先後再三稟請照舊開通。規復舊制。奴才留心察訪。衆論僉同。復於查閱工程之便。順道往勘。實於各船及商民生計均形窒礙。勢非復開不足以示體恤。現在鄭工早經竣事。並無黃水下注。惟查原開門戶甚寬。挑濬亦深。全行拆啓。需款甚多。而轉瞬新漕起運。又難從緩辦理。再三酌覈。惟有先行酌開金門。量挑上下淤淺。使通舟楫。藉水衝刷。再將吳城七堡攔河築壩。以遏其引回之路。趁此水勢消落。趕爲籌辦。庶可收事半功倍之效。而該集鎮商民亦得復其舊業。裨益甚大。費用較省。理合附片陳明。下部知之。

34 乙亥。長順、富爾丹奏。奴才等前因長春教匪謀逆。先期破獲。並吉林府屬煙筒山等處大股賊匪搶擾。派兵勦捕。業將各情專摺奏報在案。嗣據長春府知府同勳稟稱。該府回任後。即提夥匪侯得山等研訊。供詞閃爍。不吐實情。當以傳教匪首在逃。密派幹役陋緝。於本年十一月二十八日。在吉林府界朱家大屯客店內拿獲逆僧蘇安祥一名。訊明實係教首。與前獲正法之謝添明等供詞脗合。並稱道匪匡姓等已在奉天八面城地方練有數百人。候伊約齊多人再行起事等語。當飭就地正法以安衆心。又據全營翼長富興等呈稱。煙筒山一帶賊匪已由該處附近駐紮練隊協同民團實力攻勦殆盡。前月十八日夜。當賊匪初出山時不過數十人。正值該處隊官愛希朗阿帶隊赴太陽嶺一帶巡緝。留營隊兵無多。寡不敵衆。以致煙筒山街鋪戶被焚二十餘家。居民星散。愛希朗阿聞信折回。並邀集黑瞎子岡鄉團趙貴、解啓之等幫同攻勦。致斃賊十餘名。並獲礮車一輛。賊復南走。

裹脅漸衆。維時雙陽河、荒裏波勒河套繼起教匪百餘名。與煙筒山賊合股。退入小城子地方。教匪孫剛家盤踞旋立木城。實以泥土。將爲持久之計。愛希朗阿率同兵圍攻打一夜未下。次日經雙河鎮駐紮委參領梧林帶領隊兵並邀各處鄉團追抵該處。與愛希朗阿合隊圍攻。仍先撥兵扼其入山之路。然後進擊。賊以小黃旗施展邪術。我軍鎗多炸壞。賊由內闖出。鎗子如雨。鄉團頭目趙廷好之子文學。練目張啓恩陣亡。兵團受傷數十人。均無退志。復以穢物裝入擡鎗連擊。賊始驚亂。紛紛逃竄。我軍追殺數十里。共斃賊三十餘名。生擒十餘名。受傷逃脫者數十名。奪獲大車三輛。騾馬二十四匹。杏黃旗一桿。鎗械邪書無數。又搜獲割去髮辮者五六十名。均係沿途被脅鄉民。多有大戶的保。就近釋放。查詢鄉民。知賊中手執黃旗者即僞軍師孫剛。已於敗逃時自刎身死。此十八至二十二連日痛勦賊匪之情形也。又據靖邊親軍王寬呈報。二十六日抵至煙筒山時。賊已削平。人心尙屬惶恐。因即徧搜餘匪。遂獲跡近教匪之莊殿發等弟兄二名。並於其家搜出孫剛家眷老小六口。餘賊十餘家均已全數遠颺。細查二百餘人內除去裹脅逸去者不過數十人各等情。先後稟報前來。並據署磨盤山州同寶印芳陸續拿獲教匪張連舉、韋學詩等二名。報明到省。奴才等當飭各軍撥隊進山搜勦匪。務期盡絕根株。不使復生萌孽。一面將獲匪趙永汎、李得、李殿汝、莊殿五、孫方鎮、王守田、張遇恆、王材、張樹、吳金榮、梁葆均、陳廣礪、高淮、王得勝、宮中增等十五犯提省。飭交發審局訊明。該匪等與孫剛素習邪教。早蓄異謀。自十一月初有朝陽教匪馬連啓潛至該處。勾串孫剛並該匪等起事。以爲朝陽接應。孫剛稱爲軍師。趙永汎名爲謀主。其所備鎗礮刀矛馬匹。均係平日預儲及掠取各鋪家防夜之物。日前與官兵接仗時。間用紙人紙馬以助聲勢。嗣因邪術不靈。致被擒獲。供詞歷歷如繪。當經批飭將該匪等立行正法。其餘已獲未辦各匪。應俟解到時再行訊辦。奴才等查此次教匪滋事。其人數連各處併計已不下千餘人之多。幾蹈朝陽覆轍。仰賴聖主威福。或消患於將萌。或遏亂於方發。實堪深幸。然地方文武各官。俱能先事覺察。臨時用命。並各鄉團亦復踴躍爭先。效死不去。不無微勞足錄。合無仰懇天恩。俯准奴才等擇尤酌保數人。以示鼓勵。並將陣亡民團從優請卹之處。出自鴻慈逾格。得旨。著准。

其酌保數員。毋許冒濫。

35 丙子。寅廷臣於乾清宮。

36 丁丑。賞捐助直賑翰林院編修鹿瀛理侍講銜。

37 諭。前據卞寶第奏。福建詔安縣大布寨胡姓擄殺徐姓一案。首犯胡印龍父子逃匿廣東饒平縣王姓家中。該縣王崧有庇匪玩法情事。當諭令希元提案審辦。嗣據李瀚章奏。兩省知縣各執一詞。與卞寶第前奏情形不同。復諭令希元秉公研訊。茲據希元訊明定擬覆奏。此案廣東已革饒平縣知縣王崧。雖無庇匪玩法重情。惟未將差役帶赴會審。又未訊出作踐匪犯確供。以致案懸未結。枝節叢生。咎有應得。業經革職。著毋庸議。撤任詔安縣知縣吳庚揚。拿犯遲延。又不將應訊之犯王粗皮等即日研審。與泉永道吳世榮會審此案。未訊供詞。先定稟稿。並爲王粗皮預寫甘結。均難辭咎。吳庚揚、吳世榮均著交部議處。餘著照所議辦理。該部知道。

38 戊寅。予續昌病假兩月。

39 己卯。龍湛霖奏。江西在籍候補主事龍文彬著有明會要八十卷。謹繕進呈。得旨。留覽。

40 庚辰。諭。貴恆係多羅貝勒奕綱包衣佐領下人。現已補授刑部尙書。著加恩擡入鑲白旗滿洲。

41 德馨奏。鵝湖書院現因添課建修。擬請捐撥經費與辦。並懇頒賜匾額。允之。

42 崧駿奏。浙江省溫台兩屬。素多盜匪。誅不勝誅。久在聖明洞鑒之中。本年三月間。著匪毛炳一糾集黨與創立洋鎗會名目。在溫台連界地方行劫樂清縣事主倪卓氏等家。得贓放鎗拒傷倪洪林身死。擄去倪洪岳等勒贖。又行劫永嘉縣事主胡鳳翔家。燒燬房屋。放鎗拒斃胡理全等五命。擄去林振芳等勒贖。據署樂清縣知縣惲退齡。署永嘉縣知縣邵秉經先後稟報。奴才以土匪猖獗若此。非痛加懲創。不足以懾匪膽而安民生。當經飛飭統領溫台防營海門鎮總兵楊岐珍抽調防軍親督會剿。猶虞不敷分布。復飭調駐紮鎮海之記名總兵黃錦文帶領弁勇前往溫州會商勦捕。並飭地方文武懸賞購緝合力兜拿去後。旋據該營縣先將被擄之倪洪岳、林振

芳等押釋。並陸續報獲匪犯李均考、戴阿蒙、王以銓、龔嶺樹、李可邊、李永昆、黃老五、周瑞興、暨小奶、葉錫蘭等十名。飭由該管道府訊明。各犯與毛炳一等劫掠放火拒捕擄人屬實。先後照章批飭正法梟示。臨拿格斃之張小柳、朱綁棍、葉式良、王法薪、李可多、暨征端及不識姓名匪黨三名。亦飭戮屍示衆。特以巨魁稽誅。復嚴飭會拿毛炳一務獲究懲。各員弁並知殲斃巨匪麻面度人已蒙聖恩准予擇優保獎。無不感激思奮。力圖報稱。楊岐珍深以該匪毛炳一此拿彼竄爲慮。督率截拿。嚴杜竄逸。該匪計無可施。率黨遁匿永嘉縣樟溪地方。黃錦文部將段生福偵知。即會同邵秉經督帶弁勇及義民周朝七等密往掩捕。該匪等負隅抵拒。鎗斃互施。弁勇向前直撲。登時格斃毛炳四及匪黨四名。梟取首級。該匪毛炳一猶敢抵抗拒。經弁勇合力圍捕。毛炳一勢窮力竭。始克就擒。並搜獲洋鎗九龍袋子藥等件。我軍營勇亦被拒傷五人。據黃錦文、楊岐珍等報經飭道訊據毛炳一供認。糾同張小柳等數十人。先後行劫事主倪卓氏等家放火殺人擄人勒贖不諱。稟經照章批飭正法梟示以昭炯戒。伏查溫、台地方。夙爲盜匪淵藪。全在勇營勦捕認真。方足以資綏靖。年來台屬如方小紅九、潘連樹、亭頭六等。皆係著名巨匪。滋擾爲害。各員弁等在洋在陸。終歲馳驅。無間寒暑。次第擒斬計已不下二三百名。此次該匪毛炳一集黨創立洋鎗會名目。放火劫殺。無惡不作。尤爲兇狠。勦辦稍遲。必至滋蔓難圖。多煩兵力。今幸該員弁等戮力同心。或懸賞購緝。密爲偵探。或勇往撲捕。奮不顧身。始克殲厥大股。消除隱患。洵屬異常出力。若欲策其將來。似非擇尤保獎不足以鼓舞士氣。可否仰懇天恩逾格俯准將出力員弁彙案擇尤保獎以示鼓勵之處。伏候聖裁。得旨。准其酌保數員。毋許冒濫。該部知道。

43 王文韶、譚鈞培奏臣等前奏進剿獬黑夷匪迭次獲勝情形一摺。光緒十七年十月初十日欽奉硃批。覽奏均悉。即著飭令派出各軍實力勦辦迅速竣事。欽此。當即札飭督辦鎮邊軍務護理迤南道劉春霖欽遵辦理。劉春霖以此次叛逆推東主、閑官、富角、義永、帕五佛房爲盟主。佛房者。夷民信佛。平日奉夷僧如神。故其地皆以佛房爲名。佛房之外又各有家口營。則皆結寨列柵。與佛房相依爲固。五佛房中。東主較近內地。而山深地險則

莫如永帕。此外夷寨星羅密布。皆分隸五佛房而聽命也。擒賊擒王。非將五佛房一律蕩平。夷禍終無了日。先是派出前敵三路官軍自搶渡黑河後。八月二十四日。楊宗墀、刁煥彰一路分兵進攻磨乃。新營盤二賊寨。鏖戰一晝夜。次第攻破。二十五日。楊宗墀由田壩一路進兵。道路險峻。賊勢甚悍。楊宗墀激勵士卒奮勇直前。步步緊迫。刁煥彰由三岔路進兵。賊營環列。刁煥彰選派得力弁兵。乘其不備。抄出賊後。腹背夾擊。遂將賊壘踏平。與楊宗墀會合。圍攻東主佛房。該逆固守不出。相持多日。楊宗墀商令刁煥彰埋伏山後。用重兵三面圍攻。鎗礮齊發。奮力攻擊。賊始不支。奪路狂奔。當將東主佛房攻破。復乘勝將富角、閑官兩佛房之賊先後攻潰。賊衆均退至東主、閑官兩家口營堅守。是役斬獲獐夷首級耳記。奪獲鎗械弓弩無算。官兵間有傷亡。此楊宗墀、刁煥彰等一軍攻克東主、富角、閑官三佛房之情形也。李雲、李春陽、屈洪德等一路自攻克雲藍城後。合兵進取義宋佛房。該處頭目震懾兵威。率衆乞降。該管帶等曉以大義。諭以禍福。該頭目俯首帖耳。誓不復反。李雲等遂於二十八日率隊前進。鎮邊營參將鄒位虔督帶開花礮隊繼至。九月初九日。各帶所部直逼東主家口營之後龍山。擠聚連營三座以佔地勢。初十日。賊見我軍扼要俯瞰。即糾合閑官、富角家口營之賊大股撲營。該管帶等督隊分擊。鏖戰竟日。賊勢愈熾。乃挑選各營奮勇抄攻賊壘前棚。李春陽督率弁兵力攻後棚。身先士卒。燒燬棚門。首先攻入。當將東主家口營攻克。殺賊無算。並殲其酋。各軍乘勝追殺。其閑官、富角各家口營。聞風奔潰。我軍即就賊營駐紮。計是役生擒東主夷酋之妻父李自名一名。管事漢奸李勝保一名。悍賊四名。斬獲首級數十顆。搜獲木質偽印一顆。奪獲旗幟鎗刀二百餘件。官軍亦陣亡數十人。此李雲等各軍收撫義宋佛房及攻克東主等各家口營之情形也。自東主、富角、閑官三佛房及各家口營攻破後。各佛房所屬夷寨紛紛投順。不下數十處。惟漏網賊目挾其死黨敗投永帕佛房。恃險羈聚。永帕夷酋又勾結野狽狽及棚子擺夷各種。約計萬餘人。盤踞前山。砍伐樹木。紮卡拒守。與相距四十里之牛牛堆爲犄角之勢。九月十四日。楊宗墀、李雲、刁煥彰督兵進攻。賊出大隊迎戰。我軍再接再厲。賊亦愈聚愈多。互有傷亡。未能進取。劉春霖因兵機稍頓。於十月十一日馳抵東主大營就近督勦。即

令楊盛新、李春陽、屈洪德等專圍牛市堆賊巢以分其勢。令土都司李芝隆密派頭目劉顯齡購通匪黨。率敢死之士潛入賊營。將野狝狉及棚子擺夷並被脅漢民暗中開導。允爲內應。一面密約各軍於十三日夜間舉事。至期楊宗墀率所部爲左路。李雲率所部爲右路。鄒位虔率所部並尉遲念賓之士兵爲中路。同時並進。賊衆傾巢抵敵。戰事方酣。刁煥彩、李芝隆兩軍突由後攻入。劉顯齡率領約降漢夷反戈相向。縱火接應。裏外夾攻。全山震動。賊夷之死於亂軍及奪路狂奔滾巖落澗者。不計其數。遂將永帕佛房削平。十六日（陽順）（楊盛）新、李春陽、屈洪德乘勢亦將牛市堆堅巢攻破。統計是役斬賊一百二十餘名。招降二千餘衆。拔出被脅漢土夷民五百餘家。擒獲賊目石扎發、張扎科及其管事石鄉長、李鄉長等多名。訊據供稱。永帕逆首石大閑已爲亂軍所殺。當將石扎發等即在軍前正法梟示。此官軍三路會合攻克永帕佛房及牛市堆巨巢之情形也。劉春霖於十一月初四日進紮猛朗。查知五佛房之外尙有所謂西盟三佛主者。其酋爲夷僧李同明。其地縱橫三百餘里。管轄夷民四千餘戶。當五佛房叛亂時。該夷僧護持同教。不免首鼠兩端。又閑官逆酋張輞輔及戕害尉遲東曉之賊首李阿奪等。均在逃未獲。劉春霖恐根株未淨。難保不死灰復燃。因懸立重賞。多方購覓。並派營員劉樹策、普子義等。酌帶親軍馳赴三佛主地方剴切開導。該夷僧見該佛房已就殲夷。傾心就撫。呈遞歸順結狀並繳偽印一顆。且稱張輞輔挾衆匪入狝狉。已爲狝狉刦殺。經劉樹策等確查無異。而屈洪德亦探悉李阿奪父子逃匿所在。購綫誘獲解營。經劉春霖提訊。實係戕官首惡。當將李阿奪及其子扎拉其婿李扎母奪並其黨鍾三元等四名一併正法。邊境一律肅清。據護理迤南道劉春霖署理普洱鎮屈洪泰先後馳報前來。臣等查鎮邊地方甫經開闢。設官置戍。粗具規模。及本年四月間。忽有游勇漢奸煽惑新附猓夷。乘地方文武沿邊勘界。突起變端。以致參將被戕。廳員被困。一時人心洶洶。震動非常。當飭護理迤南道劉春霖星馳前往督辦防勦事務。自五月至八月。夷疆瘴厲正盛。未能用兵。中秋節後。兵分三路。搶渡黑河。迭將東主、永帕等五佛房分別勦撫竣事。並將向未歸化之西盟三佛主一併內附。拓地數百里。且初次平定猓黑。因各佛房聞風納款。不忍加兵。以致有此反覆。此次大加

懲創。用制蠻方。種夷既一律輸忱。卽附近各土司亦足壯守邊之膽。固由天威遠布。關外帡幪。而各將士深入瘴鄉。履危蹈險。擒渠搗穴。出死入生。不無微勞足錄。自應仰乞恩施。用昭激勸。謹擇尤另繕清單。恭呈御覽。其餘在事出力文武員弁。可否容臣等查明酌量保獎。恭候諭旨遵行。土都司李芝隆。獨當一面。購獲內應。計破堅巢。厥功甚著。據報在營瘴故。實堪矜憫。應懇天恩。交部從優議卹。其歷次陣亡傷亡瘴故各員弁兵丁。俟查明另行核辦。添募之新軍四營一百五十人。應請暫留楊盛新一營以資鎮撫。其餘概行裁撤。現在關地加廣。應辦鎮邊善後事宜。按奏定章程。不無應行變通之處。應仍飭劉春霖督同署鎮邊同知王績威重新經畫。稟由臣等覆加酌核。請旨辦理。上諭。王文韶。譚鈞培奏官軍勦辦黑叛匪新闢夷疆肅清邊境一摺。雲南鎮邊地方。上年突有新附猓夷聚衆滋事。拒捕戕官。經王文韶等檄飭護理迤南道劉春霖督同文武員弁分路進兵。實力勦辦。當將東刀多件。漏網各賊竄至永帕佛房。勾結野狚。及棚子擺夷負嵎抗拒。道員劉春霖等設法開導。四面分兵攻勦。內外策應。復將永帕佛房。牛市堆賊壘分別削平。斬首百數十名。擒獲賊目石扎發等多名。正法梟示。招降二千餘衆。拔出被脅難民五百餘家。並將向未歸化之西盟三佛主一併招降。其戕官首惡均被官軍擒獲正法。邊境一律肅清。在事出力員弁。奮勇可嘉。自應量予獎勵。以示鼓勵。該部知道。單一件片三件併發。

44 升泰奏。奴才前於十一月初六日。曾將夫馬不齊一時未能啓程情形具奏在案。茲於十一月下旬。始據商上稟稱。遠近夫馬逐一到齊。行糧一切採辦均備。奴才擬即隨帶員弁兵丁。剋期啓程。旋據邊務委員黃紹勳。張防稟稱。月之十六日。赫政來云。通商游牧及文報往來一切章程。一併臚列條款。明日保爾即須攜往孟臘。與衆印官詳加斟酌。俟奴才到邊有期。卽由納蕩打電。再由赫政電往孟臘。便可遵照起身。決不遲滯。並云文報往來可以仍照前議。通商五年。無論出入貨物。彼此均不納稅。至於游牧一層。擬以一年照舊不納草費。隨後卽應按照哲孟雄保護章程辦法。其有西藏應禁貨物。並請先行明示。免致到邊後再議。徒多往返各等語。查文報游牧

果能如此辦法。自易了結。惟稅務章程。奴才前經陳明素未諳習。應請總理各國事務衙門示下遵辦。藏中應禁各物。奴才雖未深悉。而藏人無不週知。應詢駐邊番員邊覺奪吉便悉。當飭該委員等據覆赫政轉達保爾。並與保爾約期會同赫政。仍派該委員等一併護送前來。行館飭在仁進岡行營預備。奴才即於十二月初三日由藏帶印啓程。到邊後靜候保爾赫政前來。再將如何酌議情形陸續據實奏聞。所有本藏衙門日行事件。暫委西藏糧員候補通判王延齡代拆代行。遇有緊要公事。包封遞送行營。仍由奴才斟酌辦理。俟新任幫辦大臣奴才奎煥到任後。一切地方公事。卽由該幫辦大臣會商奴才公同辦理。得旨。該衙門知道。

45 升奏。據第穆呼圖克圖阿旺洛桑稱。勒拉普結稟稱。此次赴邊應派噶布倫一員前往。查商上例設噶布倫四員。自伊喜洛布汪曲於十六年十一月初六日病故後。懸缺未補。現只三員。均皆年逾六旬。於洋務邊情未甚熟悉。且商上公事繁多。勢難分派。查大招商卓特巴邊覺奪吉。前經大衆公議稟請奏派赴邊辦理邊務。該員年力正強。辦事老練。可否准其卽以商卓特巴暫署伊喜洛布汪曲所遺噶布倫一缺。以重事權而資鼓勵。一年後果堪勝任。再行稟請補放等情前來。奴才伏查赫政前遞保爾覆函內稱。請飭商派一掌事番官。當經奴才譯飭遵辦。旋據稟稱。駐邊番員邊覺奪吉係由商上大衆公議稟請奏派之員。卽可掌事。無庸另派。當經函覆具奏。各在案。茲既據稱該商卓特巴辦事老練。懇以該員暫署伊喜洛布汪曲遺缺。核與保爾函內請派掌事番官之議相符。噶布倫又係商卓特巴應陞之階。合無仰懇天恩。卽以該商卓特巴邊覺奪吉署理伊喜洛布汪曲所遺噶布倫一缺。實於邊務不無裨益。至應否補放。俟奴才到邊察看能否勝任及邊務果否始終無誤。再行奏請補放。允之。

46 辛巳。遣載卓恭詣慕陵致祭。

47 以湖北記名提督宋德鴻捐建淮軍嵩武軍昭忠祠。並設義塾以教忠裔。准予立案。

48 癸未。遣奎瑛恭詣泰東陵致祭。

49 以吳殿元爲直隸大名鎮總兵。

50 溥芸請開差使。允之。賞食半俸。

51 甲申。前任西安將軍尙宗瑞卒。卹蔭如例。並賞銀五百兩治喪。

52 丁亥。諭軍機大臣等。劉坤一奏江北冬漕遵辦河運請飭疏通河道一摺。據稱。大泛口、濟甯新店、安山一帶。或河係砂礮。或異常淺澀。十里鋪、陶城埠口門內外。淤墊更甚。以及南陽湖進出口門均須大加挑濬等語。南漕關緊緊要。所有漕船經行河道。必須豫籌疏濬。方能迅速抵通。著許振禎、福潤、湯聘珍嚴飭該管河道各官認真挑濬。務期一律深通。以利漕行。將此由四百里諭知許振禎、福潤。並傳諭湯聘珍知之。

53 己丑。遣麟嘉恭詣裕陵致祭。

二月

光緒十八年二月

1 庚寅朔。剛毅奏。臣於光緒十六年十月十七日承准軍機大臣字寄。光緒十六年十月初六日奉上諭。前據兵部奏裴蔭森、楊昌濬由福建拜發摺件中。途屢被拆毀。當經諭令卞寶第等查辦。茲據卞寶第奏稱。即經派委委員逐站挨查。閩、浙兩省驛站均無拆毀情事。請令沿途各督撫飭屬嚴查等語。奏摺夾板屢有遺失。斷無各驛站全無拆換之理。自應一體嚴查。以期水落石出。著李鴻章、剛毅各飭所屬挨站確查。究係何處私拆。即行據實覆奏。從嚴懲辦等因。欽此。當經行司委員認真查辦。茲據臬司陳湜詳稱。前臬司張國正遴委候補知縣周玉鳴先至與浙江接壤之首站吳江。查得該縣平望驛於光緒十四年九月初四日接浙江西水驛遞到福州將軍於八月二十三日拜發奏摺夾板一付。外用篋包。印花油紙封面。先經浙江西水驛查驗。篋包甚薄。用天平秤過。計重十二兩。由西水驛遞夫殷世五手出具甘結一紙。經該站驗明復秤。逐站轉遞至江蘇末站宿遷縣峒嵒驛。馬夫高雲轉遞山東首站鄒城縣紅花埠驛接收。查驗篋包。計重分兩均屬相符。取有甘結。又十五年十二月二十三日。平望驛接浙江西水驛遞到船政大臣於十二月十三日拜發奏摺一付。篋包完固。逐站遞到峒嵒驛。轉遞

鄰城縣紅花埠驛接收。取有篋包完固並無破損甘結。是蘇省接遞以上兩次奏摺夾板。取有山東紅花驛出具計重分兩相符甘結。取有篋包完固並無破損甘結。其爲並非蘇省各驛站失少無疑。惟十四年十月二十七日平望驛接到浙江西水驛遞到福州將軍於十月初六日拜發奏摺夾板一付。黏有浙江皂林驛遞夫陳應高升甘結一紙。載明外面篋包破碎微露摺匣係上站原來字樣。逐站遞至高郵州界首驛。查明號簿均屬與原來相符。自界首驛轉送寶應平安驛。則稱篋包尚屬完好。並無擦破。亦無皂林驛甘結。查核情節。顯係高郵州界首驛驛書拆換篋包。將結放在匣內朦混轉遞。稟由臬司行提該驛馬夫陳谷。驛書韓應選到省。發交蘇州府魁元研審。供詞均屬含糊。現在俱各患病。未能嚴行審訊。應請將失察之前任高郵州知州謝國恩先行揭參前來。臣查驛站往來文報。關係甚重。專管官宜如何選派驛書馬夫。慎速馳遞。乃該驛書韓應選等接遞福建省摺件。膽敢擅換朦混。該州未能查出稟辦。實非尋常失察可比。自應據實嚴參以肅功令。相應請旨將前任高郵州知州謝國恩先行交部議處。得旨。如所請行。

2 辛卯諭。福錕等奏醇賢親王安葬事宜。請飭擇吉舉辦一摺。朕欽奉慈禧端佑康頤昭豫莊誠壽恭欽獻皇太后懿旨。著欽天監於本年四月內選擇吉期。奏明辦理。

3 王文韶、譚鈞培奏。臣等於上年十二月間具奏勦辦披河蠻匪竣事一摺。光緒十七年正月初二日欽奉硃批。知道了。仍著嚴拿祿文仁等務獲懲辦。出力人員准其擇尤酌保。毋許冒濫等因。欽此。遵即嚴飭在防各營認真捕拿。旋經管帶綏靖左營參將王天長等於四月初二日在中梁子地方將蠻酋祿文仁拿獲解省。訊明正法。業於本年五月十七日附片奏報在案。茲據該管地方文武及帶兵各員將在事出力人員開列職名稟請獎敘。當經批飭善後局司道悉心察核。從嚴刪汰。擇其尤爲出力之員開單詳請奏獎前來。臣等查披河地方孤懸金沙江外。界屬川滇。蠻夷雜處。撫馭甚難。上年蠻酋祿文仁等率其醜類出巢滋擾。勢甚披猖。邊民深受其害。該處深林密箐。峭壁懸崖。官兵進剿。則閉關踞險。無徑可尋。迨我軍收隊。則設伏遮要。輒乘不備。賊情地勢均異常。

此次派出各軍一鼓作氣奮不顧身。陷一陣始能進一步。奪一隘艱於克一城。節節前進。步步爲營。未及兩月。即將披河屬境一律蕩平。兇悍蠻匪斬馘殆盡。餘衆受撫。積年被擄良民。悉數資遣回籍。蠻酋祿文仁被勦窮蹙。亂竄狂奔。幾幾倖逃法網。防營將士多方偵探。竭力搜捕。卒將肇亂逆酋擒獲。解省懲治。當勦匪喫緊之際。四川督臣劉秉璋來函。謂川西沿邊數千里盡屬土司。內地則峨馬雷屏。越嶲環列。大小涼山夷支百餘族。壤連腹地。若滇蠻日久稽誅。句結爲亂。則川患不可勝言。蓋披河插入川疆。於滇省一江之隔。於川則頭頭是道。防不勝防也。臣等忝膺邊寄。深懼貽禍鄰疆。督飭各軍及地方文武。相機決策。勒限程功。幸而將卒用命。奮勇馳驅。不辭艱險。衝鋒陷陣。搗穴擒渠。實屬異常出力。所有單開在事文武員紳。臣等詳加查核。並無冒濫。合無仰懇天恩。准照所請。獎敘以昭激勵。下部議奏。

4 甲午。命桂祥、文秀管理神機營事務。

5 戊戌。祭社稷壇。上親詣行禮。

6 以張聯桂爲廣西巡撫。

7 李鴻章奏。據統領武毅等軍直隸提督葉志超等聯名呈稱。淮軍勦辦粵捻以來。大小數百戰。立功死綏諸將士。疊荷恩褒。迨巨寇削平。各軍調辦海防。修築臺壘。勤苦工操。遇有積勞亡故人員。咸蒙奏卹。凡在戎行。同深感奮。伏查江蘇之蘇州。無錫。湖北之武昌。直隸之保定。皆係淮勇立功地方。疊經奏奉勅建淮軍昭忠祠。專祀勦平粵捻陣亡傷故文武員弁勇丁及海防積勞病故人員。各在案。廬州爲淮軍創始之地。祠祀至今缺然。署甯夏鎮總兵衛汝貴。去歲治喪回里。與在籍江蘇候補道李天鉞及各紳士詳議。擬援湖南湘鄉縣及洞庭君山湘軍昭忠祠故事。在廬州府城東南之巢湖中廟空隙處。所創建淮軍昭忠祠。所需工款。各軍自行捐助。請奏明立案。列入祀典。由地方官春秋致祭等情。臣維咸豐初年。粵逆竄擾皖北。捻匪復芽孽其間。廬州爲爭戰要衝。羣寇環伺。其時臣父刑部郎中記名御史李文安暨臣先後奉旨回籍辦理團防。因督同在籍紳團故兩廣總督張樹聲。

前福建臺灣巡撫劉銘傳、故湖南提督周盛波、故廣西巡撫潘鼎新等部分子弟招致豪傑、各練鄉勇、屢殲巨寇、保衛里閭、以忠義相提倡、爲粵賊所畏憚。同治元年、臣奉命督師東下、忝任蘇撫、創立淮軍、諸人並率所部以從。今四川總督劉秉璋、故廣東水師提督吳長慶等、亦以旁縣之士各成一軍、隨同進剿、其後戡定全吳、肅清二捻、戰伐之迹、徧於浙、閩、江、皖、鄂、豫、直、東各省。將士盡瘁効忠、後先相望、疊蒙恩旨卹贈有加、廕賞逮於子孫、崇祠徧於南北、裏忠之典、曠代罕儔。昔大學士曾國藩於咸豐八年奏建湘鄉縣昭忠祠、謂上以體聖世裏忠之意、下以勵鄉人觀感之誠、逮粵逆既平、曾國藩復爲祠記、歷序軍事本末、而推原於人心、忠誠之激發、蹈死亡而不悔、臨艱險而不避、故能芟夷大難、歷久而不變也。淮軍之起、逾三十年、同時共事之人、存者十不一二、而部曲將校遞統其衆、皆昔時百戰相隨之士、並能修明紀律、不墜軍聲。迄今拱衛畿疆、東至營青、南迄閩廣、屹爲海防得力之師、其留防江鄂各軍、雖經汰裁、猶稱勁旅。歷時雖久、士氣不衰。廬州爲各將士故鄉、親見從前治軍締造之勤、捍衛之績、其後父兄弟從征四方、長往不返、歲時霜露、良足感傷。各省皆有祠祀、而本郡獨無、懼無以稱朝廷褒卹忠勤之至意。該提督擬仿湘鄉縣及洞庭湘軍昭忠祠成案、於廬州巢湖之中廟隙地捐建淮軍昭忠祠、用申報饗、庶以妥侑毅魄、昭示來茲、合無仰懇恩施、俯准一體列入祀典、由地方官春秋致祭、以昭激勸、得旨、如所請行。

。庚子、以黃槐森爲廣西布政使、唐樹森爲貴州按察使。

。沈秉成奏、臣承准軍機大臣字寄、光緒十七年七月二十七日奉上諭、有人奏各省教案迭出、請飭嚴辦、保甲一摺、據稱、沿江一帶、會匪最多、常德、漢口、大通、蕪湖、鎮江、清江浦、周家口、皆商賈薈萃之區、匪徒易於匿跡、請飭各省擇尤舉辦、保甲等語、保甲爲弭盜良法、如果實力奉行、何至會匪游勇結黨滋事、層見迭出、著沈秉成督飭各屬認真舉辦、不得因循廢弛、視爲具文、亦不得任令胥役藉端騷擾、務使會匪無所潛蹤、俾免勾煽爲患、是爲至要、原摺均著鈔給閱看、將此各諭令知之、欽此、遵旨寄信、並鈔發原摺前來、臣遵卽恭錄札知藩臬兩司、欽